

■ CONVIVENZA

Bler fim e pauc brassà

PIEDER CAMINADA*

Na, jau na sun betg a la tshertga d'ina plazza da lavur. Tuttina le- gel jau da temp en temp las publicaziuns da plazzas libras en las gasettas. Al- main quai ch'è restà da quellas. Igl ha dà temps che las publicaziuns da plazzas libras en las gaset- tas grondas sumegliavan in cudesch gross. Oz sa tracti en il meglier cas anc d'in pèr paucas paginas – tge che n'è ni bun per las cha- sas edituras ni per las per- sunas che tshertgan lavur.

Sche jau sfegl puspè ina giada en las publicazi- uns da plazzas libras, ma dumond jau mintgatant schon, sche jau ses el fauss film. In exempel: Tge dia- vel è atgnamain in Key Ac- count Manager? Forsa fiss quai perfin mes job dals siemis ... U è Key Account Manager be ina circum- scripziun per persunas che lavuran tar in servetsch da clavs? Natiralmain betg. In Key Account Manager è «in spezialist da vendita che tgira clients spezial- main impurtants», ma di il Duden. Pia clients-clav. E la finamira d'in Key Ac- count Manager saja «d'augmentar la svieuta da l'interpresa cun s'orientar als basegns da la clientel- la», hai jau legì en in arti- gel dal fatg.

Betg che la professiun dal Key Account Ma- nager fiss per mai dal tutta- fatg impossibla. A la fin fi-



nala dispon jau d'expe- rientschas en il sectur mer- cantil (era sch'igl è gia quatter decennis dapi lu- ra). E sco anteriur collavu- ratur dad in'interpresa comerciala turitgaisa per- fin d'experienschas inter- nazionalas. Resta anc il di- scurrer cun carstgauns; quai hai jau atgnamain er emprendì sco schurnalist.

Ma enavos tar las pu- blicaziuns da plazzas libras. Jau pudess era m'an- nunziar sco Chief Informa- tion Security Officer tar la Confederaziun. In tal tshertga l'Inspecturat fe- deral da la segirezza nuclea- ra ENSI/IFSN. Chief è na- tiralmain adina bun, pertge che tgi n'è betg gugent il schef? E cun infurmaziun hai jau gì da far prest mia entira vita professiunala. Okay, security n'è betg pro- pi mia cumpetenz-clav. Ed en l'Armada svizra n'hai jau era betg fatg ina carriera d'uffizier. Là era jau be in simpel gidanter da biro – pia giudim dal tut.

Ma i dat era ordaifer las funcziuns da ca- der plazzas ch'empermettan

dapli ch'ellas pon tegnair. Il Sales Supporter tar in'assi- curanza sustegna betg mo ils collavuratur dal ser- vetsch extern, mabain prenda era encunter telefo- nats da clients ed elavura offertas. Pia in classic em- ploia da commerzi. Ed il coiffeur daventa da blagun in hairstylist. Pia in tip d'artist. U en auters plets: bler fim e pauc brassà.

Quant plaschaivlamain sincer sa preschenta qua l'hotel «Bodenhaus» a Spleia. Là han ins dacurt tshertgà simplamain in «Abwäscher». Quai na sto per cas betg esser uschè mal! Ins enconuscha gea las istorgias legendaras dals lavavaschella ch'èn stads buns da far il pass da giudim dal tut en fin sisum dal tut.

Ma bain! Sche jau ponderesch tut quai, sun jau atgnamain detg cuntent che jau na stoss – per raschuns da vegliadet- gna – betg pli m'annunziar per plazzas, da las qualas jau na sai gnanc tge che jau stuess far là. Ubain sco in bun ami da mai ha la disa da dir: «Sas Pieder, il me- glier vi da nus è che nus es- san gia uschè vegls.»

*Pieder Caminada è mainaproject scolaziun e redactor tar la «Südostschweiz». El è creschi si a Glion en in ambient per gronda part tudestg e viva oz en il vitg rumantsch da Castrisch.

La convivenza da culturas – quai è il tema da las columnas che cumparan sut il titel «Convivenza» mintga glin- desdi en la Südostschweiz ed en La Quotidiana.